

清陰集

九

内閣文庫	
番號	漢 17816
冊數	38 ( 9 )
函號	集 135 1



清陰先生集卷之十

清平錄

乙亥三月八日戊午冒雨發石室踰車踰嶺過鷄  
山里屈雲驛沿江而行憇大生村崔氏庄故興  
叔丈別業石田茅屋負山臨水依然有山陽之  
感過清平堤蚕室甘泉驛驛前老槐垂陰數畝  
昔年到此納涼處火藝樹心枝條半枯非復曩  
觀過加平郡秣馬超然臺下登眺徘徊左江右  
谿交會其前高灘惡水噴激喧撼東則疊嶂擯  
峯西南荒野地勢高聳俯視窅然憚乎不可久

留江上石棧二十里夕宿安保驛自石室至此  
百餘里中間涉五大川水險石多小雨行旅不  
通

超然臺

尋春遠客傍山來落日停驂訪古臺飛出海中  
鰲戴立登臨磨上蟻旋迴清江翠峽雲雷轉細  
草新花錦繡裁二水三山難寫處令人更憶謫  
仙才

安保驛

古驛依山口柴荆八九家縈門綠羅水帶岸白

銀沙好鳥歌深樹閑厖睡落花誰知荒僻處獨

自擅華奢

九日己未春川

時姪光煥為守

送馬來迎踰席破嶺嶺路

峻狹僅通一馬穹林濬壑目眩心悸記壬辰避  
寇盡室徒步過此追感愴然渡新淵江祭鳳凰  
臺臺在昭陽江西許頗有游觀之美勞憊思息  
未暇訪焉宿春川府內自安保至此三十餘里  
十日庚申終日雨夕登邀仙堂佳觀滿前不減所  
聞

十一日辛酉促行登昭陽亭亭在鳳儀山北去治

所五里許俯臨長江前眺平野近依巖洞遠挹  
羣山清晏幽迥不可備述嘗論江湖樓觀之擅  
名一方余所歷覽者練光亭愜眼稱心令人樂  
而忘歸而逼近閭閻欠超然出塵之想百祥樓  
宏濶杜麗浩浩乎如坐空虛之上而有關塞感  
慨之思降仙樓清流絕壁映帶攔檻幽闐遼夏  
四時俱宜而無敵豁夷曠之樂樂民亭宏濶侔  
百祥穩愜遜練光而無有閭閻關塞之疵清心  
樓帶官村而不戢其近環衆山而不覺其礙曠  
然以暢脩然以靜所可議者天造地設自然不

及於以上諸名區畢竟甲乙之第誰最居前而  
神遊夢想其在茲亭乎俟與具眼者確論

### 昭陽亭

三月昭陽江上樓樓前形勝最堪遊地迥天高  
擬滕閣渚清沙白似夔州杏花已落桃花老王  
孫未歸芳草愁酒酣倚柱發長嘯西山落日射

牛頭

牛頭山名

下亭由舟渡江水清見底沙礫可數過牛頭山

歷扶服遷

但言機道為遷

入清平洞自春川至此四十

餘里到歡喜嶺下馬觀瀑布阿煥兩李

得塔二重慶

崔再亨弘善生隨至坐松壇酌數巡清流盤石長松  
古木列于左右正值雨後山花盛開水勢益壯  
澄映發揮亦一奇也

入山

入洞穿林路百迴隔花遙見有仙臺丹崖翠壁  
重重慶一道銀川噴雪來

又上數百步有影池水色澄綠山腰見性菴寫  
影其中以此得名池之兩隅築石堰水水若滲  
漏易竭而旱不枯水不溢亦可異也環池赤木  
四五株其大連抱麗僧懶翁所植云

影池

止水千年一色清上方金碧倒空明客來羞照  
星星鬢聊就池邊試濯纓

清平寺本慶雲山普賢院高麗李資玄棄官隱  
居于此者三十七年更名清平寺寺前雙池二  
碑西則宋建炎四年金富轍紀李資玄事僧坦  
然書東則元泰定皇后為太子箴經于此以祈  
福利者李益齋譙季杏村書門額慶雲山清平  
寺者僧普雨筆殿寮廊序周匝繁麗儼然一大  
叢林也近歲髡徒役繁居守者無數百指將為

廢刹可惜法堂西北隅有極樂殿亦普雨所建  
金碧丹雘僭侈異常寺南洞中有細香院清寒  
子所棲止今廢

十二日壬戌觀西川西川在寺西數百步許盤石  
疑滑清流映帶高下淺深隨勢停瀉左顧右眄  
無不會心悅目樂而忘歸川上有臺仰見芙蓉  
峯突兀撐空慶雲峰在其西

西川

清平山中遊三日西川水石最清絕水從石上  
來蜿蜒中間豁然開洞天銀漢昭回通玉宇

田仿佛移玄圃松下古壇凝碧苔山風漠漠山  
花開同來亦有二三子把酒高吟水聲裡清平  
之遊樂無伍安得辭家此中住

由川上右轉六七里入仙洞崎嶇窈窕有小庵  
庵後石壁刻清平息庵四大字真樂公筆云舊  
誌息庵團圓如鵝卵只得盤兩膝默坐其中數  
月不出者即此也今之小庵乃後人所建庵後  
又有羅漢殿殿前懸流側壁石臺下鑿石二所  
真樂公盥盆臺北巖間藏古器嘗雨塌開視流  
傳真樂瘞骨處真樂者李資玄易名也

息庵

息庵居士遊何處千古精靈入冥漠鏡崖刻石  
留古跡至今未遺莓苔蝕松陰滿地不見人石  
壇桃花春自落

自息庵由山腰路狹僅容一跡至見性庵庵在  
芙蓉峰下地位最高俯視諸洞壑檜頂松巔皆  
在履下又轉一岡有養神庵頽廢不足觀觀止  
於此矣

十三日癸亥朝出西川依依戀戀至晚下山訪牛  
頭寺遺址臨江夾岸為堂形勝亞昭陽亭

出山

仙山欲別幾回頭江路迢迢草色愁林外鳥聲  
如送客洞門斜日苦鉤輶

牛頭亭

牛頭山下前朝寺興廢悠悠閱幾年經殿梵堂  
俱化盡渚烟江月只依然

春川故貊國山水清峭號為名區精藍寶刹宜  
若相望於山林之內而惟清平之名聞於四方  
餘無一二可見者蓋清平一洞泉石之義大嶺  
以西未有其似造化之巧亦豈非有窮也哉

貊都懷古

太初天子漫勞我玄菟纔分滄海開休道貊城  
無處所漢家宮闕已塵灰

十四日甲子終日雨自昭陽江乘舟江水盛漲舟  
行甚駛峽山左右奇峰怪石樾紅新綠釣渚樵  
逕花村柳岸可詩可畫者應接不暇到超然臺  
捨舟登陸夕宿加平卓家滯雨二日十七日還  
石室

出峽


鳳岫山前雨滿衣昭陽江上水初肥誰教好事

龍眠手畫我孤舟出峽歸

崇禎乙亥暮春之下浣石室山人記

清陰先生集卷之十





清江先生集卷之十一

